

PROVINCIA SCYTHIÆ.

TOMI Antonino in Itiner. vulgò *Tomiswar* Metropolis Scythiæ Autocephala. ¹ *Theotimus* hujus Episcopus scripsit Epistolam ad Leonem Imperatorem, quæ reperitur parte tertia actorum Concilii Chalcedonensis.

ÆTHERIUS Episcopus Chersonesi Provinciæ Scythiæ Constantinopolitano Concilio subscripsit, ut legunt antiquæ membranæ. LUCAS HOLSTENIUS.

PROVINCIA GOTHIÆ, SEU
DACIÆ ANTIQUÆ.

² ZARMIZEGETUSA Ptolem. lib. 3. cap. 8. Gothorum Metropolis, ut arbitramur, & eadem cum illa urbe, quæ in Notitia Leoni tributa apud Leunclavium Gothia dicitur, & inter Archiepiscopatus seu Sedes Autocephalas recensetur. Non enim alia verisimilior sententia mihi in mentem venit: maximè cum Zarmizegethusa Regia dicatur à Ptolemæo, reveraque major illustriorque civitas hujusce regionis fuerit, in qua Gothi à patriis sedibus exeuntes habitarunt. Gothiam Metropolim statuit Ortelius non longè à Ponto Euxino, & rectè equidem, cum eam regionem Gothi incoluerint, sed ei locum non assignat: ego verò his non parum probabilibus ductus rationibus Zarmizegetusam esse conjicio. *Theotimus* autem Episcopus Gothiæ subscripsit Concilio Nicæno.

NOTÆ LUCÆ HOLSTENII.

¹ *Theotimus &c.*] Terentius Constantinopolitano.

² *Zarmizegetusa &c.*] Silvanum Gothiæ Episcopum Audianorum hæresi addictum commemorat Epiphanius hæres. lxx. pag. 828. Ex quo loco regionem illam Regem proprium gentilem, & Ro-

mani nominis hostem habuisse apparet. Locus Epiphani maxime notandus, unde apparet Gothiam ultra Scythiam sitam esse, eam scilicet, quæ Tomos Metropolim habuit, de qua hac eadem pag. Unde rectè colligitur Gothiam tunc fuisse, quæ nunc Walachia, aut Transilvania dicitur.